

Ataqatigiissaarinermut ataatsimiititaliat aamma ataqatigiissaarinermut immikkoortortat pillugit kaajallaasitaq

Naalakkersuisut Suleriaasianni § 1, imm. 4 naapertorlugu aalajangersarneqarput:

Naalakkersuisut politikkikkut sulinerannik ataqatigiissaarineq

§ 1. Ataqatigiissaarinermut ataatsimiititaliaq ataaseq aamma ataqatigiissaarinermut immikkoortortat pingasut Naalakkersuisut politikkikkut sulinerannik ataqatigiissaarisussatut pilersinneqassapput.

Imm. 2. Ataqatigiissaarinermut ataatsimiititaliap aamma ataqatigiissaarinermut immikkoortortat politikkikkut akisussaaffeqarfiit akimorlugit, innuttaasut inuiaqatigiillu pisariaqartitaasa ataatsimoortutut isiginerat aallaavigalugu, Naalakkersuisut politikkikkut siunnerfisa ataqatigiisaariffiginissaat suliassaraat.

Imm. 3. Taamatuttaaq politikkikkut akerleriiffusinnaasut isumaqatigiinngiffusinnaasullu, suliassat Naalakkersuisuni ataatsimiissutigineqannginneranni oqaluuserineqarsimanissaat aaqqiiviginiarneqarsimanissaallu, taakkua qulakkiissavaat.

Imm. 4. Naalakkersuisut Siulittaasuat politikkikkut suliassat ataasiakkaat aaqqiiviginissaannut, ataqatigiissaarinermut immikkoortortanik allanik pilersitsisinnaavoq.

Ataqatigiissaarinermut ataatsimiititaliaq

§ 2. Ataqatigiissaarinermut ataatsimiititaliamiipput:

- 1) Naalakkersuisut Siulittaasuat.
- 2) Naalakkersuisut Siulittaasuata tullia.
- 3) Aningaasaqarnermut, Naligiissitaanermullu Naalakkersuisoq.
- 4) Nunanut Allanut, Inuussutissarsiornermut Niuernermullu Naalakkersuisoq.

Ataqatigiissaarinermut ataatsimiititaliap suliassai

§ 3. Naalakkersuisut ataqatigiissaagaasumik suliniuteqarnissaat aammalu naalakkersuisooqatigiinnissamut isumaqatigiissummi siunnerfiit anguneqarnissaasa qulakkeernissaat, ataqatigiissaarinermut ataatsimiititaliap suliassaraa.

Imm. 2. Aamma Naalakkersuisut sulinermi pisussanut pilersaarutaata malinnaaviginissaa ataqatigiissaarinermut ataatsimiititaliap suliassaraa.

Imm. 3. Suliassat suliassaqqarfiit akimorlugit suleqatigiinnissamik pisariaqartitsiviusut,

ataqatigiissaarinermut ataatsimiititaliap suliarissavai.

Imm. 4. Suliassat politikkimut imaluunniit aningaasaqarnermut tunngasut pingaaruteqartut, avataaneersut suleqatigisat akuliutsinnginneranni, tamatigut ataqatigiissaarinermut ataatsimiititaliami suliarineqartassapput.

Imm. 5. Suliassat suut ataqatigiissaarinermut ataatsimiititaliap suliarissanerai, kiisalu suliassat suut ataqatigiissaarinermut immikkoortortanit suliarineqassanersut, ataqatigiissaarinermut ataatsimiititaliap aalajangissavai.

§ 4. Ataqatigiissaarinermut ataatsimiititaliap suleriaasissani nammineerluni aalajangersassavaa.

Imm. 2. Naalakkersuisut Siulittaasuata Naalakkersuisoqarfiani naalakkersuisoqarfimmut pisortaaneg Ataqatigiissaarinermut ataatsimiititaliamut allattaavoq.

Ataqatigiissaarinermut immikkoortortat

§ 5. Inunnut Ataqatigiissaarinermut immikkoortortat tassaapput:

- 1) Meeqqanut, Inuusuttunut, Ilaqutariinnut Peqqissutsimullu Naalakkersuisoq, siulittaasoq.
- 2) Isumaginninnermut Sulisoqarnermullu Naalakkersuisoq.
- 3) Ilinniartitaanermut, Kultureqarnermut, Timersornermut Ilageeqarnermullu Naalakkersuisoq.
- 4) Ineqarnermut Attaveqaasersuutinullu Naalakkersuisoq.
- 5) Aningaasaqarnermut, Naligiissitaanermullu Naalakkersuisoq.

§ 6. Aningaasaqarnermut Inuussutissarsiornermullu Ataqatigiissaarinermut immikkoortortat tassaapput:

- 1) Aningaasaqarnermut, Naligiissitaanermullu Naalakkersuisoq, siulittaasoq.
- 2) Nunanut Allanut, Inuussutissarsiornermut Niuernerullu Naalakkersuisoq.
- 3) Nunalerinermut, Imminut Pilersornermut, Nukissiutinut Avatangiisinullu Naalakkersuisoq.
- 4) Aatsitassanut Inatsisillu Atuutsinneqarnerannut Naalakkersuisoq.
- 5) Aalisarnermut Piniarnermullu Naalakkersuisoq.

§ 7. Pisuussutinut uumassusilinnut Avatangiisinullu Ataqatigiissaarinermut immikkoortortat tassaapput:

- 1) Aalisarnermut Piniarnermullu Naalakkersuisoq, siulittaasoq.
- 2) Nunalerinermut, Imminut Pilersornermut, Nukissiutinut Avatangiisinullu Naalakkersuisoq.

Ataqatigiissaarinermut immikkoortortat suliassat

§ 8. Ataqatigiissaarinermut immikkoortortat ataasiakkaat akisussaafeqarfisa iluanni Naalakkersuisut siunnerfisa ataqatigiissaarneqarnissaannik qulakkeerinnisaq, ataqatigiissaarinermut immikkoortortat suliassaraat.

Imm. 2. Ataqatigiissaarinermut immikkoortortap akisussaafeqarfisa iluanni politikikkut pingaarnersiunerit, ataqatigiissaarinermut immikkoortortani ataasiakkaani suliassanik ataqatigiissaarinermi ingerlaavartumik oqaloqatigiissutigineqartassapput.

Imm. 3. Naalakkersuisup Naalakkersuisut isummernissaannut tunngavissiamik suliaqartup, isummernissamut tunngavissiap Naalakkersuisuni ataatsimiinnissamut oqaluuserisassani

ilanngunneqannginnerani, ataqatigiissaarinnermut immikkoortortami politikkikkut tusarniaassutigineqarnissaa qulakkiissavaa.

Imm. 4. Ataqatigiissaarinnermut immikkoortortat ataqatigiissaarinnermut ataatsimiititaliap ataaniipput.

§ 9. Ataqatigiissaarinnermut immikkoortortat nammineerlutik suleriaasissartik aalajangersassavaat aammalu siulittaasortik aamma siulittaasup tullia nammineerlutik toqqassallugu.

Imm. 2. Ataqatigiissaarinnermut immikkoortortanut ataasiakkaanut allattoqarfeqarneq, ataqatigiissaarinnermut immikkoortortanut ataasiakkaanut siulittaasutut toqqarneqarsimasumut Naalakkersuisoqarfimmi pisortaanermit isumagineqassaaq.

Imm. 3. Akisussaaqqarfirmik iluanni suliassaqarfiit akimorlugit suliassat oqaluuserisassaniilernissaat, Naalakkersuisunut ilaasortat ataasiakkaat akisussaafigaat.

Imm. 4. Suliassaq ataqatigiissaarinnermut ataatsimiititaliamut saqqummiunneqartariaqartoq ataqatigiissaarinnermut immikkoortortaq naliliippat, suliassaq ataqatigiissaarinnermut immikkoortortap ataqatigiissaarinnermut ataatsimiititaliamut nassiutissavaa.

Ataatsimiittarnerit

§ 10. Ataqatigiissaarinnermut ataatsimiititaliaq aamma ataqatigiissaarinnermut immikkoortortat qaammammut minnerpaamik ataasiarlutik ataatsimiittassapput.

Imm. 2. Ataqatigiissaarinnermut ataatsimiititaliami Naalakkersuisut Siulittaasuata Naalakkersuisoqarfia ataatsimiigiaqqusisuussaaq.

Imm. 3. Ataqatigiissaarinnermut immikkoortortani siulittaasuusoq ataaatsimiigiaqqusisuussaaq.

Atuutilersitsineq

§ 11. Kaajallaassitaq ulloq 3. septembari 2022 atuutilissaaq.

Naalakkersuisut Siulittaasuata Naalakkersuisoqarfia, ulloq 2. septembari 2022

Múte Bourup Egede
Naalakkersuisut Siulittaasuut

/ Simigaq Broberg

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut